

Na temelju člana 158. stav 2. Zakona o zaštiti prirode („Službene novine Federacije BiH“, broj: 66/13), člana 33. i člana 72. Statuta JP Nacionalni park „Una“ d.o.o. Bihać i Prethodne suglasnosti Federalnog ministarstva okoliša i turizma (broj: 04/2-19-44/24-2 od 22.11.2024. godine), Nadzorni odbor JP Nacionalni park „Una“ d.o.o. Bihać na VIII (osmoj) sjednici održanoj 26.12.2024. godine, donosi

P R A V I L N I K

O UNUTARNJEM REDU U NACIONALNOM PARKU »U N A«

I. OPĆE ODREDBE

Član 1.

Ovim Pravilnikom uređuju se pitanja zaštite, unapređenja i korištenja Nacionalnog parka »Una« (u daljnjem tekstu: Nacionalni park), te određuju upravne mjere za nepoštivanje odredaba ovoga Pravilnika.

Član 2.

Zaposlenici Javnog preduzeća Nacionalni park „Una“ d.o.o. Bihać (u daljnjem tekstu: Preduzeće), stanovnici Nacionalnog parka, vlasnici ili korisnici nekretnina u Nacionalnom parku, te fizička i pravna lica koja na području Nacionalnog parka obavljaju dopuštenu djelatnost i posjetioци Nacionalnog parka, dužni su se pridržavati odredaba ovoga Pravilnika.

Član 3.

Preduzeće upravlja područjem Nacionalnog parka na temelju Zakona o Nacionalnom parku „Una“, Plana upravljanja Nacionalni parkom Una, Prostornog plana, ovog Pravilnika i drugih propisa i planskih dokumenata koji se tiču ovog zaštićenog područja. Preduzeće je dužno brinuti o zaštiti, održavanju i promicanju Nacionalnog parka.

II. UNUTARNJI RED U NACIONALNOM PARKU

1. PLOVIDBA RIJEČNIM TOKOVIMA

Član 4.

Kretanje plovila vodotocima u Nacionalnom parku dozvoljeno je uz dopuštenje Preduzeća na rijeci Uni. Zabranjena je plovidba na rijeci Unac od lokaliteta Lučica u Martin Brodu uzvodno do granice Parka (Berek), cijelim vodotokom rijeke Krke i rijekom Ostrovicom od ušća u Unu do izvora Ostrovice. Plovidba rijekama Unac i Krka dopušta se u iznimnim slučajevima uz odobrenje uprave Preduzeća.

Za plovidbu je se mogu koristiti slijedeća plovila:

- čamac (unaska lađa),

- gumenim čamcem (rafting čamcem),
- kajakom,
- kanu plovilom.

Upotreba plovila koji se pogone motorima na unutarnje sagorijevanje strogo je zabranjena. Korištenje plovila na pogon sa motorom na unutarnje sagorijevanje je iznimno dozvoljeno za potrebe Preduzeća, kao i za potrebe policije, vojske i gorske službe spašavanja, te u druge svrhe uz odobrenje Preduzeća.

Član 5.

Plovidbu vodotocima u Nacionalnom parku organizira Preduzeće u svrhu organizacije posjećivanja i sportsko-rekreativne svrhe, kao i pravna lica koja imaju odobrenje Preduzeća za pružanje usluga prijevoza plovilima u sportsko rekreativne svrhe (rafting, kajakaštvo i lađarenje). Lokalno stanovništvo i vlasnici nekretnina u području Nacionalnog parka plovidbu vodotocima vrše u skladu sa ovim Pravilnikom i drugim propisima.

Član 6.

Sportsko-rekreacijska plovidba u Nacionalnom parku se vrši na određenim dionicama vodotoka:

- dionicom od piknik zone Lučica u Martin Brodu na rijeci Unac nizvodno rijekom Unom do Štrbačkog buka i dalje se nastavlja i završava na sjevernoj granici Nacionalnog parka odnosno 250 m nizvodno od Dvoslapa.

Sportsko-rekreacijska plovidba na rijeci Uni dionicom Štrbački buk–Lohovo vrši se isključivo rafting i kajak plovilom putem specijaliziranih i registriranih agencija koje imaju odobrenje Preduzeća za obavljanje djelatnosti na način i pod uvjetima koji su propisani važećim propisima za riječnu plovidbu i aktima koje donosi Preduzeće.

Plovidba sa vlastitim ili iznajmljenim plovilom bez pratnje licenciranog skipera na određenim dionicama vodotoka moguća je pod uvjetima koje propisuje Preduzeće.

Član 7.

Posjetioци koji posjeduju plovilo i propisanu opremu, plaćaju naknadu Preduzeću kupovinom posebne ulaznice na prodajnim mjestima. Za plovidbu u vlastitoj organizaciji dionicom Štrbački buk-Lohovo, obavezno je angažiranje licenciranog upravljača plovilom (skipera).

U rafting plovilu obavezno je prisustvo minimalno jednog skipera. Kod vođenja grupe kajakaša obavezan je minimalno jedan skiper-kajakaš (vođa grupe) na maksimalno 20 kajak plovila.

Ulaznica za rafting i kajak ujedno je ulaznica za obilazak posjetilačke zone Štrbački buk-Lohovo na dan plovidbe.

Član 8.

Vlasnici ili korisnici nekretnina u Nacionalnom parku imaju pravo korištenja plovila za vlastite potrebe, radi pristupa svojim nekretninama i rekreacijske svrhe.

Član 9.

Stalni privez plovila, u dijelu rijeke Une mogu imati plovila Preduzeća, stanovnici odnosno vlasnici ili korisnici nekretnina u Nacionalnom parku sukladno propisima i uvjetima koje posebnim aktom utvrđuje Preduzeće.

Iznimno, stalni ili privremeni privez plovila mogu imati i druga pravna i fizička lica uz dopuštenje Preduzeća.

Postavljanje i privezivanje plovećih platformi uz obalu, molova i vršenje bilo kakvih drugih zahvata na obalama rijeka strogo je zabranjena.

Preduzeće će donijeti provedbene akte kojima će se odrediti uvjeti i način uspostavljanja registra plovila vlasnika ili korisnika nekretnina u Nacionalnom parku.

Član 10.

Pravnim i fizičkim licima uvjete za vršenje plovidbe na rijeci Uni i visinu naknade određuje Preduzeće posebnim aktima.

Plovidba vodotocima Nacionalnog parka je na vlastitu odgovornost putnika.

2. KORIŠTENJE VODNOG DOBRA

Član 11.

Vode Nacionalnog parka mogu se koristiti samo na način da se ne mijenja, vodni režim, kvaliteta vode i živog svijeta u njoj, oblik korita ili da se na bilo koji drugi način utječe na prirodne odnose vodotoka i priobalnih zemljišta, osim ako to zahtijevaju potrebe za zaštitom obala od erozije, potrebe za opskrbom pitkom vodom, potrebe za zahvate za zaštitu voda ili uvjeti za zaštitu protiv štetnog djelovanja voda.

Član 12.

Pravna lica koja koriste vodna dobra u Nacionalnom parku dužna su prilikom korištenja istih postupati u skladu s odredbama važećih propisa, Prostornog plana, te koncesionih prava i obaveza.

Korisnici vodnog dobra koji svojim radnjama i djelatnostima ugroze izvornost prirode i prouzrokuju štetu dužni su je nadoknaditi. Naplaćena naknada za štetu koristi se za sanaciju i zaštitu dijela prirode na kojem je šteta nastala.

3. KUPANJE I OBAVLJANJE PODVODNIH AKTIVNOSTI

Član 13.

U vodotocima Nacionalnog parka kupanje u posjetilačkim zonama i zonama stroge i usmjerene zaštite je dozvoljeno samo na mjestima označenim za ovu namjenu od strane Preduzeća. Zabranjeno je kupanje cijelim vodotokom rijeka Unac i Krka.

Znakove i natpise te označavanje kupališta iz stava 1. ovoga člana određuje i postavlja Preduzeće.

Član 14.

Na području Nacionalnog parka dozvoljeno je obavljanje podvodnih aktivnosti (u naučno-istraživačke svrhe, sportsko-rekreacijsko ronjenje i podvodno snimanje) uz odobrenje Preduzeća. Za sportsko-rekreacijsko ronjenje i podvodno snimanje naplaćuje se naknada Preduzeću.

Lokacije za sportsko-rekreacijsko ronjenje i podvodno snimanje određuje i označava Preduzeće.

Član 15.

Pravnim i fizičkim licima koja organiziraju i vrše podvodne aktivnosti iz člana 14. ovoga Pravilnika uvjete određuje Preduzeće posebnim aktima.

4. SPORTSKO - REKREATIVNI RIBOLOV

Član 16.

Na vodotocima Nacionalnog parka sportsko-rekreativni ribolov je dozvoljen na određenim dijelovima vodotoka rijeka u Nacionalnom parku – ribolovnim revirima.

Za sportsko-rekreativni ribolov u Nacionalnom parku potrebno je ishodovati ribolovnu dozvolu koju izdaje Preduzeće.

Ribolovna dozvola se izdaje za vremenski period najkraće za 1 (jedan) dan, a najduže za 7 (sedam) dana u kontinuitetu za mušičarske revire (fly fishing). Najduže na vremenski period do godinu dana izdaju se ribolovne dozvole za ostale ribolovne revire.

Član 17.

Visinu naknade, ribolovne revire, metode i način ribolova, količinu ulova, veličinu ulova, alate i pribor za ribolov, kao i ostale uvjete za obavljanje sportsko-rekreativnog ribolova utvrđuje Preduzeće posebnim aktom.

Stanovnicima i vlasnicima nekretnina u Nacionalnom parku, određenim kategorijama i članovima ribolovnih društava u Bosni i Hercegovini (državljanima BiH), ribolovna dozvola se može izdati po povoljnijim uvjetima.

Član 18.

Izlaz ribe nije dozvoljen u ribolovnim revirima za mušičarenje (fly fishing) gdje se lov propisuje isključivo po principu „ulovi i pusti“.

Član 19.

Sportsko-rekreativni ribolov nije dozvoljen noću, niti se može vršiti ribolov s čamca. Za vrijeme lovostaja ribolov je zabranjen.

Za obavljanje djelatnosti na području Nacionalnog parka potrebno je pisano odobrenje Preduzeća u kojem se pobliže utvrđuju uvjeti za obavljanje djelatnosti.

5. LOV

Član 20.

Lovna područja (lovišta) s uvjetima njihovog korištenja, vodeći računa da se područje stroge i usmjerene zaštite s odgovarajućom sigurnosnom (tampon) zonom od minimalno 500 m odredi kao ne lovno područje, posebnim propisom će urediti Vlada Federacije Bosne i Hercegovine u skladu sa Zakonom o Nacionalnom parku Una, Zakonom o lovstvu i važećim planskim dokumentima koji se odnose na Nacionalni park.

6. ZAŠTITA ŽIVOG I NEŽIVOG SVIJETA

Član 21.

Nije dozvoljeno oštećivati ili iz prirode uzimati primjerke ugroženih divljih vrsta, osim u svrhu naučnih istraživanja kao i unositi neautohtone vrste šumskog drveća i grmlja osim za potrebe saniranja erozija ili započetog ozelenjavanja zemljišta.

Član 22.

Ne smiju se unositi u vodotoke neautohtone vrste riba i druge neautohtone životinjske vrste niti namjerno puštati genetski modificirani organizmi u okoliš. Strogo je zabranjeno loviti zaštićene, rijetke i ugrožene vrste divljači.

Član 23.

Na području Nacionalnog parka nije dozvoljeno loviti, hvatati, proganjanjati, ozljeđivati ili ubijati zaštićene, rijetke i ugrožene vrste divljači i uzimati iz prirode životinje koje nisu određene kao divljač ili ribe, osim u svrhu naučnih istraživanja i stvaranja uvjeta zaštite životinjskih vrsta sukladno propisima iz područja zaštite prirode kao i radi provođenja sanitarnih mjera i uspostave prirodne ravnoteže. Nije dozvoljeno oštećivanje njihovih razvojnih oblika, gnijezda ili legla i obitavališta.

Član 24.

Zabranjeno je loviti, hvatati i uznemiravati ptice osim vrsta koje se pravilnikom za lov odrede kao lovne. Autohtone životinje u Nacionalnom parku odstranit će se lovom kojeg organizira Preduzeće uz prethodno odobrenje Ministarstva.

Član 25.

Na području Nacionalnog parka zabranjeno je puštanje pasa s povodca izvan naseljenih područja, osim pri nadzoru ili korištenje pasa od policije i spasilačke službe, te u zonama i u vrijeme lova.

Član 26.

Na području Nacionalnog parka zabranjeno je gospodarenje šumom u komercijalne svrhe i pošumljavanje.

Iznimno, na temelju stručne studije i programa zaštite, očuvanja i održavanja šuma uz dopuštenje Preduzeća, dozvoljena je sanitarna sječa, sječa uzgojnog karaktera, uzgojni radovi i pošumljavanje, ako služi očuvanju i promicanju očuvanja šumskih zajednica u Nacionalnom parku.

Član 27.

Dozvoljena je sječa drveta za vlastite potrebe u privatnim šumama u skladu sa programom gospodarenja privatnim šumama i na osnovu njega donesenih propisa.

Član 28.

Nije dozvoljeno odvoziti šljunak, pijesak i kamenje iz vodotoka i vodnih i priobalnih zemljišta, osim u opsegu i količini određenoj u planu upravljanja vodnim slivom ili njegovih dijelova, ili ako su takvi zahvati nužni za uređenje vodnog režima i sprečavanje erozije obala vodotoka. Nije dozvoljeno isušivati ili zatrpavati vlažna staništa i iskorištavati mineralne sirovine. Zabranjeno je branje, sakupljanje, uklanjanje i oštećivanje biljki sa vlažnih staništa i obala rijeka bez dopuštenja Preduzeća.

Član 29.

Nije dozvoljeno pošumljavati poljoprivredna zemljišta, osim ako to nalažu mjere za zaštitu od erozije ili klizišta, kao ni isušivati ili zatrpavati vlažna staništa.

Član 30.

Nije dozvoljeno koristiti agrokemijska sredstva za uništavanje raslinja i životinja (herbicidi i insekticidi) izvan obradivih površina, niti koristiti sredstva za zaštitu bilja izvan obradivih površina.

Član 31.

Na području Nacionalnog parka košnja i tradicionalna ispaša stoke je dopuštena. U režimu stroge i usmjerene zaštite nije dopušteno napasanje stoke i košnja izvan za to određenih područja.

Član 32.

Zabranjeno je izgrađivati pristupe obali, obalu, lučice, ploveće platforme, vezove, brodove (gazove) i druge vrste pristaništa na svim obalama vodotoka na području Nacionalnog parka, osim na određenim mjestima i uz uvjete koje propisuje Preduzeće.

7. NAUČNA ISTRAŽIVANJA I PRAĆENJE STANJA

Član 33.

Nacionalni park je područje značajnih prirodnih vrijednosti od interesa za naučnu zajednicu namijenjen je i naučnom istraživanju i praćenju stanja vrsta i staništa.

Naučna istraživanja na području Nacionalnog parka koja provode druge organizacije i stručnjaci, moraju imati suglasnost uprave Preduzeća.

Za istraživanje zaštićenih biljnih i životinjskih vrsta mora se pribaviti dopuštenje Ministarstva. O dopuštenju iz stava 3. ovoga člana izvještava se Ministarstvo.

8. POSJETILAČKE ZONE I POSJETITELJI

8.1. Posjetitelji

Član 34.

Nacionalni park kao prostor namijenjen je posjećivanju.

Posjetilac Nacionalnog parka je osoba koja iz naučnih, obrazovnih, rekreativnih, turističkih, sportskih i kulturnih potreba i razloga boravi na području Nacionalnog parka kraće od 15 dana, kao i osoba u tranzitu kroz područje Nacionalnog parka.

Član 35.

Posjetilačke zone su dijelovi Nacionalnog parka, pretežno sa većim stepenom zaštite koje svojim karakteristikama čine veliko prirodno područje vrijednih ekosistema i procesa koji se u njima odvijaju i vrsta koje u njima obitavaju, a istovremeno pruža osnovu za okolišne i kulturalno prihvatljive rekreativne, naučne, duhovne, edukacijske i posjetilačke aktivnosti.

Ulazak posjetilaca i vlasnika nekretnina u posjetilačke zone se isključivo vrši putevima i stazama kroz kontrolno-ulazne tačke (ulaze).

Član 36.

U području Nacionalnog parka uspostavljene su dvije posjetilačke zone sa privremenim ulazno-kontrolnim tačkama (ulazima):

- posjetilačka zona „Štrbački Buk–Lohovo” sa ulazima: broj 1. „Gorjevac”, broj 2. „Ćukovi”, broj 3. „Ćelije”, broj 4. „Lohovo” i broj 6. „Račić”,
- posjetilačka zona „Martin Brod–Unac–Krka” sa ulazom broj 5. „Milančev buk” u Martin Brodu.

Član 37.

Posjetioци za ulaz u posjetilačke zone Nacionalnog parka plaćaju propisanu naknadu kupovinom ulaznice na ulazima.

Visinu naknade za ulaz u posjetilačke zone Nacionalnog parka po kategorijama posjetilaca, posebnim aktom utvrđuje uprava Preduzeća uz prethodnu suglasnost Nadzornog odbora.

Za vrijeme boravka u posjetilačkim zonama Nacionalnog parka posjetioци su dužni sačuvati ulaznicu i na zahtjev nadzornika ili druge ovlaštene osobe Nacionalnog parka predočiti na uvid.

Za posjećivanje Nacionalnog parka van posjetilačkih zona ne plaća se naknada Preduzeću izuzimajući sportsko-rekreativni ribolov i aktivnosti na/u vodi.

Član 38.

Vlasnici ili korisnici nekretnina u posjetilačkim zonama Nacionalnog parka imaju slobodan pristup svojim nekretninama.

Preduzeće će izvršiti popis katastra nekretnina u posjetilačkim zonama i donijeti provedbene akte kojima će se odrediti uvjeti i način uspostavljanja režima kretanja vlasnika ili korisnika nekretnina u posjetilačkim zonama Nacionalnog parka.

Član 39.

U posjetilačkim zonama Nacionalnog parka posjetiocima je dozvoljeno kretanje samo putevima i stazama koje su označene i namijenjene razgledavanju i posjećivanju.

Pravce kretanja i mjesta koja se mogu posjećivati u Nacionalnom parku utvrđuje Preduzeće sukladno važećim propisima i planskim dokumentima.

Pravci kretanja i mjesta koja se mogu posjećivati moraju biti označena signalizacijom.

Član 40.

Kretanje posjetilaca izvan puteva i staza iz člana 39. dozvoljeno je samo uz odobrenje Preduzeća.

8.2. Transport posjetitelja, promet i parkiranje

Član 41.

Prijevoz posjetilaca nekategorisanim javnim i šumskim putevima i razgledavanje Nacionalnog parka organizira Preduzeće, a u iznimnim slučajevima Preduzeće može prijevoz posjetilaca povjeriti nekoj drugoj pravnoj ili fizičkoj osobi na osnovu provedenog konkursa ili postupka javne nabavke.

O obavljanju djelatnosti iz stava 1. ovoga člana Preduzeće izdaje odobrenje.

Prijevoz putnika javnim prometnicama kroz Nacionalni park vrše ovlaštene javni prijevoznici.

Član 42.

Brzina kretanja vozila na motorni pogon na putevima u Nacionalnom parku ograničena je:

- za izletnički voz, traktore, poljoprivredne i radne mašine i kultivatore do 20 km/h;
- za autobuse, minibus, teretna, kombi vozila i putnička vozila sa prikolicom do 30 km/h;
- za putnička vozila do 40 km/h.

Prometovanje javnim prometnicama obavlja se sukladno propisima koji uređuju ponašanje sudionika prometa u javnom prometu.

Član 43.

Nije dozvoljeno parkirati motorna vozila i/ili kamp prikolice (kampere) izvan za to određenih mjesta.

Mjesta za parkiranje u posjetilačkim zonama određuje Nacionalni park.

8.3. Boravak i noćenje posjetitelja (gostiju)

Član 44.

Boravak i noćenje posjetitelja (gostiju) na otvorenom van registriranih smještajnih kapaciteta na području Nacionalnog parka, dozvoljen je samo na prostoru predviđenom i označenom za kampiranje (kampovima).

Iznimno u pojedinim slučajevima i uz odobrenje Nacionalnog parka, kampiranje se može dozvoliti za potrebe održavanja manifestacija, gorske službe spašavanja, istraživanja i sl..

Član 45.

Zabranjeno je loženje vatre izvan naselja i mjesta koja su posebno označena za tu namjenu.

9. OBAVLJANJE DJELATNOSTI

Član 46.

U Nacionalnom parku dozvoljene su djelatnosti koje ne ugrožavaju izvornost prirode, uz uvjete koje utvrđuje Preduzeće.

Pravo na obavljanje djelatnosti iz stava 1. ovog člana u Nacionalnom parku imaju fizička lica koje imaju prebivalište na području Nacionalnog parka, ili su vlasnici ili korisnici nekretnina u Nacionalnom parku.

Član 47.

Pravna i fizička lica koja obavljaju djelatnosti na području Nacionalnog parka dužna su postupati u skladu sa zakonom, provedbenim propisima donesenim na temelju zakona i ovim Pravilnikom.

Za obavljanje djelatnosti na području Nacionalnog parka potrebno je pisano odobrenje Preduzeća u kojem se pobliže utvrđuju uvjeti za obavljanje djelatnosti.

Član 48.

Unutar posjetilačkih zona Preduzeće će na posebno određenim i uređenim mjestima, uz pribavljeno odobrenje, omogućiti prodaju domaćih proizvoda iz kućne radinosti (sir, med, alkoholna pića i sokovi, mliječni proizvodi, domaći kolači i sl.), te prodaju suvenira, novina, duhana, razglednica i sl., drugim pravnim ili fizičkim licima. Preduzeće će donijeti posebne akte kojima će se urediti uvjeti i načini prodaje na određenim mjestima.

Za izdavanje odobrenja plaća se naknada čiji iznos utvrđuje Preduzeće.

Član 49.

U svrhu prodaje domaćih proizvoda iz kućne radinosti, te prodaje suvenira, novina, duhana, razglednica i sl. na području Nacionalnog parka mogu se postavljati kiosci, štandovi, automati za prodaju sladoleda i slične naprave (privremeni objekti).

Mjesto, vrstu, uvjete i način korištenja prava za postavljanje privremenih objekata određuje uprava Preduzeća posebnim aktom.

Dozvolu za postavljanje privremenih objekata izdaje Preduzeće.

Za korištenje privremenog objekta plaća se naknada Preduzeću čiji iznos će se utvrditi posebnim aktom.

Član 50.

Zabranjeno je snimanje ili fotografiranje u području Nacionalnog parka u komercijalne svrhe bez dopuštenja Preduzeća.

Za snimanje ili fotografiranje u Nacionalnom parku u komercijalne svrhe plaća se naknada čiji iznos utvrđuje Preduzeće posebnim aktom.

Član 51.

Pravna lica koja obavljaju djelatnost na području Nacionalnog parka, a koja koriste prirodna dobra, dužna su uskladiti svoje poslovanje sa planskim dokumentima i provedbenim propisima koji se primjenjuju za područje Nacionalnog parka.

10. OSTALE ZABRANE I OGRANIČENJA

Član 52.

Nije dozvoljeno van naseljenih mjesta ograđivati zemljišta, osim za potrebe u poljoprivredi, šumarstvu, upravljanju vodama, izvođenju naučnih istraživanja, zaštiti prirodnih vrijednosti, te objekata kulturne baštine ili kulturnih spomenika u naseljenim područjima.

Član 53.

Na području Nacionalnog parka obavljanje tradicionalne poljoprivrede je dozvoljeno.

Preduzeće organizira košenje trave i šiblja uz puteve radi protupožarne zaštite i održavanja livada na temelju godišnjeg plana poslovanja.

Član 54.

Zabranjeno je oštećivati i uništavati objekte i predmete koji imaju kulturno-istorijsku vrijednost, odnosno svojstvo ili status evidentiranog ili utvrđenog kulturnog dobra.

Nije dozvoljena razgradnja ili drugi vidovi oštećivanja ili uništavanja objekata koji predstavljaju istaknute primjerke tradicionalnog narodnog graditeljstva.

Nije dopušteno iskopavanje na mjestima gdje su ustanovljeni ili osnovano pretpostavljeni arheološki nalazi, niti njihovo zauzeće izgradnjom objekata i drugim radovima.

Preduzeće će u suradnji sa nadležnim institucijama za očuvanje i istraživanje kulturnog naslijeđa, arheološkog i etnografskog blaga sačiniti popis predmeta, objekata i mjesta iz stava 1, 2. i 3. ovog člana na području Nacionalnog parka.

Preduzeće će na pogodan i vidan način obilježiti mjesta i objekte sa kulturno-historijskim vrijednostima u Nacionalnom parku.

Član 55.

Nije dozvoljeno uzlijetati i pristajati motornim letjelicama, zmajevima, balonima ili padobranima izvan za to određenih područja.

Član 56.

Posjetioци, stanovnici, vlasnici ili korisnici nekretnina u Nacionalnom parku dužni su sve otpatke odložiti na za to predviđena mjesta i pridržavati se propisa o upravljanju otpadom i propisa o komunalnim djelatnostima i ostalih propisa o komunalnom redu.

Preduzeće je dužno osigurati i označiti mjesta za odlaganje otpada sukladno ovom Pravilniku. Zabranjeno je svako onečišćenje zraka, tla i vode, a posebno:

- odlaganje industrijskog, kućnog i drugog otpadnog materijala;
- odlaganje građevinskog otpadnog materijala;
- ispuštanje tekućina i upotreba kemijskih sredstava kojima se može ugroziti izvornost biljnog i životinjskog svijeta, odnosno onečistiti zrak, tlo i vodu.

Član 57.

Zabranjeno je odvoziti šljunak, pijesak i kamenje iz vodotoka i vodnih i priobalnih zemljišta, osim u opsegu i količini određenoj u planu upravljanja vodnim slivom ili njegovih dijelova, ili ako su takvi zahvati nužni za uređenje vodnog režima.

Nije dozvoljeno iskorištavati mineralne sirovine.

Član 58.

Kampiranje i logorovanje van građevinskih parcela i okućnica stalnih domaćinstava, obiteljskih objekata za odmor i turističko-ugostiteljskih objekata, dozvoljeno je jedino na mjestima koja su za tu namjenu određena Prostornim planom.

Izuzetno od odredbe stava 1. ovog člana, kampiranje i logorovanje se može organizirati uz odobrenje Preduzeća i pratnju nadzornika na nekom drugom mjestu, u kraćem trajanju i za manji broj osoba, a za potrebe ekoturizma i naučno – istraživačkog rada.

Dozvolu za kampiranje izdaje Preduzeće.

III. PROTUPOŽARNA ZAŠTITA

Član 59.

Protupožarnu zaštitu u Nacionalnom parku Preduzeće provodi u cilju ostvarenja preventivnih protupožarnih mjera, te je dužno organizirati i osigurati:

1. osmatračko - dojavnu službu koju obavljaju nadzornici,
2. stalnu prohodnost puteva i staza kroz šume i šumsko zemljište,
3. ispravnost uređaja za gašenje požara i njihovo stalno tehničko osuvremenjivanje,
4. zabranu loženja vatre izvan naselja i mjesta koja su posebno označena za tu namjenu,
5. uspostaviti suradnju i pružiti podršku Vatrogasnom društvu "Kulen Vakuf"

Mjere protupožarne zaštite Nacionalnog parka zaposlenici Preduzeća provode u skladu s općim aktima i planom mjera zaštite od požara za Nacionalni park.

Pravna i fizička lica na području Nacionalnog parka dužna su poštivati i primjenjivati propisane mjere zaštite od požara.

Član 60.

Nije dozvoljeno paliti vatru izvan za tu svrhu određenih i uređenih mjesta, osim nadziranog za stanovništvo u Nacionalnom parku pri obavljanju poljoprivredne djelatnosti ili paljenja drvnih otpadaka na otvorenim prostorima radi održavanja i zaštite šuma.

Na području Nacionalnog parka strogo je zabranjeno paljenje trave i korova.

Stanovnici, vlasnici ili korisnici nekretnina u Nacionalnom parku, te posjetioци Nacionalnog parka dužni su se pridržavati upozorenja u vezi sa zaštitom šume od požara.

Član 61.

Posjetiocima je zabranjeno paliti vatru izvan za to određenih i uređenih mjesta.

Unutar posjetilačkih zona pušenje je dozvoljeno samo na mjestima uređenim i označenim za tu namjenu.

IV. OZNAKE UNUTAR NACIONALNOG PARKA

Član 62.

Označavanja na području Nacionalnog parka obavljaju se u skladu sa ovim Pravilnikom i elaboratom označavanja kojeg donosi Preduzeće.

Elaborat označavanja-oznake u Nacionalnom parku podrazumjevaju vrste, izgled, dimenzije, broj, mjesto postavljanja i sadržaj oznaka unutar Nacionalnog parka.

Oznake u Nacionalnom parku su: turistička signalizacija (drvene, aluminijske i plastične) poučne table, informativne table, oznake ribolovnih revira, znakova zabrane i upozorenja, oznake plovidbenih dionica, lovnih područja sa tampon zonama, pravila ponašanja i drugih oznaka.

Član 63.

Preduzeće postavlja i druge oznake od značaja za sprovođenje režima zaštite i prezentaciju vrijednosti Nacionalnog parka, poput mjesta za kampiranje, hranilišta za životinje, mjesta za odlaganje otpadaka i sl.

Kažnjivo je uklanjanje oznaka i signalizacije, te njihovo oštećivanje ili uništavanje, kao i zaklanjanje odnosno maskiranje sa drugim objektima.

Jezično označavanje obvezno je na bosanskom i engleskom jeziku.

Jezično označavanje može biti i na nekom drugom svjetskom jeziku o čemu odlučuje Preduzeće.

Član 64.

Izvan naseljenih područja i prometnica u Nacionalnom parku nije dozvoljeno postavljati table, natpise i druge objekte za slikovno ili zvučno obavještanje i oglašavanje, ako postavljanje nije uređeno propisima o javnim i šumskim cestama, osim tabli za označavanje turističkih i planinarskih staza i puteva koje su postavljene od strane Preduzeća.

Član 65.

Granice Nacionalnog parka označavaju se tablama s natpisom Nacionalni park »Una« na mjestima gdje prometnice ulaze u Nacionalni park, gdje javni šumski putevi čine granicu zaštićenog područja i na mjestima gdje su drugi ulazi u Nacionalni park.

V. PRIJELAZNE I ZAVRŠNE ODREDBE

Član 66.

Uprava Preduzeća donijet će provedbene akte, prema odredbama ovoga Pravilnika, u roku 6 mjeseci od dana stupanja na snagu ovoga Pravilnika.

Član 67.

Ovaj Pravilnik stupa na snagu osmoga dana od dana objavljivanja u »Službenim novinama Federacije Bosne i Hercegovine«.

Broj: 02-3210-11/24

Bihać, 26.12.2024. godine

Predsjednik Nadzornog odbora

Jasmin Dervić, dipl. ekonomista